

LE **OLOMATAMATA**  
FAASILASILAINA LE MALO O IEOVA

**O LE Ā LE  
MALO O  
LE ATUA?**



# LISI O MATAUPU

3 “Ia oo Mai Lou Malo”—Le Tatalo o Loo Faia e le Faitau Miliona o Tagata

4 Aiseā e Tatou te Mana’omia ai le Malo o le Atua?

6 O Ai le Tupu o le Malo o le Atua?

8 O Afea o le a Pule ai le Malo o le Atua i le Lalolagi?

11 O le ā o le a Faataunuaina e le Malo o le Atua?

14 Ia Filifili e Lagolagoina le Malo o le Atua i le Taimi Nei!

16 O le ā le Malo o le Atua?

LE **OLOMATAMATA**  
FAASILASILAINA LE MALO O IEOVA

Vol. 141, No. 6 2020 SAMOAN

Aofa’iga o Mekasini ua Saunia: 93,281,000  
E Mau i GAGANA e 369

O LENEI MEKASINI O *Le Oloमतamata* e viia ai Ieova le Atua, le Pule Silisili Ese aoao. Ua faamāfanafanaina ai fo’i tagata i le tala lelei e uiga i le Malo o le Atua i le lagi, lea e lē o toe umi faai’uina le amiole-aga ma avea le lalolagi ma parataiso. Ua uuna’ia e lenei mekasini tagata ia faatua-tua iā Iesu Keriso, o lē na maliu ina ia tatou maua le ola e faavavau, ma ua avea nei o ia ma Tupu o le Malo o le Atua. E le’i motusia le lomiaina o lenei mekasini talu mai le 1879, ma e lē lagolagoina ai faiga faapolotiki. O lenei mekasini e faavae mai i le Tusi Paia.

*The Watchtower* (ISSN 2652-7154)  
May/June 2020 is published by  
Watchtower Bible and Tract Society  
of Australia, 12-14 Zouch Road,  
Denham Court, NSW 2565.  
© 2020, 2023 Watch Tower Bible  
and Tract Society of Pennsylvania.  
Printed in Japan.

Mo SAMOA:  
Jehovah’s Witnesses  
PO Box 673  
Apia

Mo AUSETALIA:  
Jehovah’s Witnesses  
PO Box 280  
Ingleburn, NSW 1890

Mo tuatusi uma taga’i i le  
[www.jw.org/sm/molimau-a-ieova](http://www.jw.org/sm/molimau-a-ieova).



Pe e te mana’omia ni faamatalaga atili po o se su’esu’ega faale-Tusi Paia i le aiga e aunoa ma se totoji?

Taga’i i le [jw.org](http://jw.org)

pe lafo lau talosaga i se tuatusi o loo ta’ua i inei.

E lē faatauina lenei tusi. Ua saunia e a’oa’oina ai le Tusi Paia i le lalolagi aoao, ma ua lagolagoina e ala i foa’i taufo.

Mo le faia o foa’i taufo, taga’i i le [donate.jw.org](http://donate.jw.org). Se’i vaganā ua faailoa atu, ae o mau uma o loo i lenei tusi ua sii mai i le faaliliuga

O le Tusi Paia—O le Faaliliuga a le Lalolagi Fou.



# “Ia Oo Mai Lou Malo”

**LE TATALO O LOO FAIA E  
LE FAITAU MILIONA O TAGATA**

Pe na e tatalo i le Malo o le Atua ina ia oo mai? I le tele o senituri o loo faaaauu pea ona faia e tagata nei upu: “Ia oo mai lou malo.” Aiseā ua faaaauu ai pea ona latou faia nei upu? Talu ai na faatonuina e Iesu ona soo ina ia tatalo mo le Malo o le Atua.

I le taimi muamua e le'i malamalama soo o Iesu i mea uma e faatatau i le Malo. Na latou fesili atu iā te ia: “Le Alii e, pe e te toe faavaeina le malo iā Isaraelu i le taimi lenei?” Atonu na faate'ia i latou ina ua lē avatu e Iesu se tali patino. (Galuega 1:6, 7) Po o lona uiga e lē mafai ona tatou iloa mea e faatatau i le Malo o le Atua ma le taimi e oo mai ai? E leai.

I lenei lomiga o *Le Olomatamata* o le a fe-soasoani iā i tatou e taliina ai fesili nei:

Aiseā e tatou te mana'omia ai le Malo o le Atua?

O ai le Tupu o le Malo o le Atua?

O afea o le a pule ai le Malo o le Atua i le lalolagi?

O le ā le mea o le a faia e le Malo o le Atua mo tagata?

Aiseā e tatau ai ona tatou filifili e lagooni le Malo o le Atua i le taimi nei?

O le ā le Malo o le Atua?

# Aiseā e Tatou te Mana'omia ai le Malo o le Atua?

Mai lava i le amataga o le tala faa-solopito o le tagata, e na o Ieova o Lē na foafoaina mea na avea ma pule. Sa ia pule i se auala alofa. Na ia faia le faato'aga matagofie i Etena ina ia nonofo ai tagata ma saunia le anoanoa'i o mea'ai mo i latou. E faa-poopo atu i lenā, na ia avatu i ai ni galuega aogā e latou te faia. (Kenese 1:28, 29; 2:8, 15) Sa mafai ona olioli tagata i le filemu pe ana latou tumau i le pulega alofa a le Atua.

Na faailoa mai e le Tusi Paia se agelu fouvale, na mulimuli ane ta'ua o Satani le Tiapolo lea na lu'ia le aiā a le Atua e pule ai. Na ia faapea mai e mafai ona maua e tagata le fiafia e aunoa ma le ta'ita'iga ma le pule a le Atua. O le mea e faanoanoa ai, na mulimuli Atamu ma Eva i le faaa'oa'oga a Satani ma la tetee ai i le pule a le Atua.—Kenese 3:1-6; Faaaliga 12:9.

O lo la teena o le Atua e avea ma Pule, na leiloa ai le la Parataiso matagofie ma le faa-moemoe e ola e faavavau, i le soifua mālōlō-ina lelei atoatoa. (Kenese 3:17-19) O le la fili-filiga na aafia ai fo'i le la fanau na maua mulimuli ane. Na ta'ua i le Tusi Paia, ona o le agasala a Atamu na 'oo mai ai le agasala i le lalolagi, o le oti fo'i ona o le agasala.' (Roma 5:12) O le agasala ua ta'ita'ia atu ai i se isi i'uga mata'utia: “Ua pule ai le tagata i le isi

tagata ma ua matuā afāina ai o ia.” (Failauga 8:9) I se isi faaupuga, pe a pule le tagata iā i latou lava, e faatalitalia faafitauli o le a oo mai.

## AMATA PULEGA FAALETAGATA

O le pule faaletagata muamua lava o loo ta'ua i le Tusi Paia o Nimarota, ma na ia tetee i le pulega a Ieova. Talu mai taimi o Nima-rotā, ua faaaogā sesē e i latou e iai tulaga mauululuga le pule ina ia faatigā ai i isi. Na tusi le tupu o Solomonā i le pe ā ma le 3,000 tausaga talu ai: “Ua ou iloa loimata o ē o loo sauāina, ma ua leai se tasi e faamāfanafana iā i latou. Ua iai fo'i le pule i ē e sauāina i latou.” —Failauga 4:1.

O le tulaga lava fo'i lenā i aso nei. I le 2009 na ta'ua ai e se tusi a Malo Afaatasi, o pu-lega leaga “o se tasi lea o māfuaaga autū o faafitauli o tagata.”

## TAIMI E GAOIOI AI!


Ua mana'omia e le lalolagi se pule ma se fai-gāmalo lelei. O le mea lenā ua folafola mai e Lē na foafoaina mea!

Ua faatūina e le Atua se Malo po o se fai-gāmalo, lea o le a suitulaga i pulega faaletagata, ae o le a “tumau lea malo e faavavau.” (Tanielu 2:44) O le Malo lea o loo tatalo i ai le faitau miliona o tagata. (Mataio 6:9, 10) Peita'i, e lē o le Atua o le a pulea lea faigā-malo. Ua Ia tofia e avea ma Pule sē na soifua o se tagata. O ai ua filifilia e le Atua?





Sa autasi ma filemu foafoaga uma a le Atua i lana pulega



Na teena e le ulua'i tagata le avea ai o le Atua ma Pule



Na tetee Nimarota ia Ieova



E oo lava i se pulega lelei faaletagata e le'i taulau i le fo'iaina o faafitauli matuia o tagata



# O Ai le Tupu o le Malo o le Atua?

Na faatonutonuina e le Atua tusitala o le Tusi Paia ina ia tusia faamatalaga, lea e fesoasoani iā i tatou e iloa ai Lē o le a avea ma Tupu o le Malo o le Atua. O lea Pule o le a

**Tofia e le Atua.** “O a’u lava ua ou tofia la’u tupu . . . ona ou avatu lea o nuu ese e fai ma ou tofi, ma tulu’iga o le lalolagi e fai mo oe.” —Salamo 2:6, 8.

**Tupuga mai iā Tavita.** ‘Ua fanau mai mo i tatou le tama, ua foa’iina mai iā i tatou le atalii; E leai se mea e gata mai ai le tele o lana pulega o se perenise atoa ma le filemu, i le nofoālii o Tavita ma lona malo ina ia faamausalīina ai.’—Isaia 9:6, 7.

**Fanau i Peteleema.** “Peteleema . . . e, e tupu mai iā te oe mo a’u o lē o le a avea ma pule . . . O ia aso e oo atu ai lona mamalu i tulu’iga o le lalolagi.”—Mika 5:2, 4.

**Teena e tagata ma fasiotia.** “Ua inosia o ia ma ua tatou faalēaogāina o ia. . . . Ua tu’ia o ia ona o a tatou solitulafono; ua nutililiia o ia ona o a tatou mea sesē.”—Isaia 53:3, 5.

**Faatūina mai i le oti ma faamamaluina.** “E te lē tuua a’u i le Tuugamau. E te lē tuua lē ua faamaoni iā te oe ia oo i le lua. . . . O loo i lou itu taumatau le olioli e oo i le faavavau.” —Salamo 16:10, 11.



## Iesu Keriso—Le Pule Sili Ona Agavaa

I le talafaasolopito o le tagata, e na o Iesu Keriso e fetau lelei i ai na faamatalaga. O le mea moni, na ta’u atu e le agelu iā Maria le tinā o Iesu: “E foa’iina atu fo’i e Ieova le Atua iā te ia le nofoālii o Tavita lona tamā, . . . o lona Malo fo’i e leai sona gataaga.” —Luka 1:31-33.

E le’i avea lava Iesu ma pule i le lalolagi. Nai lo o lea, o le a ia pulega tagata mai i le lagi o se Tupu o le Malo o le Atua. Aiseā ua avea ai o ia o se Pule e sili ona agavaa? Ia mātāu mea na faia e Iesu a o iai i le lalolagi.



- **Na manatu mamafa Iesu i tagata.** Na fesoasoani Iesu i fafine ma tamāloloa, tusa lava pe läiti pe matutua ma po o ā fo’i o latou talaaga. (Mataio 9:36; Mareko 10:16) Na uuna’ia Iesu e le alofa ma ia faamālōlō ai se lepela ina ua ‘ai’oi atu: “A e finagalo i ai, e mafai lava ona e faamamā iā te a’u.” —Mareko 1:40-42.
- **Na a’oa’o i tatou e Iesu i le auala e faafiafia ai le Atua.** Na ia faapea mai: “E lē mafai ona outou pologa i le Atua atoa ma ‘Oa.” Na ia ta’ua fo’i e tatau ona tatou feutaga’i ma isi, i le auala e tatou te manana’o e feutaga’i mai ai isi iā i tatou. O lenā tulafono ua ta’ua o le Tulafono Faaauuro. Na ia faailoa mai fo’i e naunau le Atua i mea e tatou te faia, aemaise le auala e tatou te mafaufau ai ma o tatou faalagona. O lea ina ia faafiafia le Atua, e tatau ona pulea o tatou faalagona

loloto. (Mataio 5:28; 6:24; 7:12) Ina ia maua le fiafia moni, na ia faamatilatila mai e tatau ona tatou a’oa’oina mea e faafinagaloina e le Atua ma ia tatou faia.—Luka 11:28.

- **Na a’oa’o i tatou e Iesu i le auala e faafiafia ai le alofa.** Na malolosi upu ma gaoioiga a Iesu lea na pā’ia ai loto o lana ‘aufaalogo- logo. Ua ‘matuā ofo le motu o tagata i lana a’oa’o atu, auā ua ia a’oa’oina i latou e pei o sē ua iai le pule.’ (Mataio 7:28, 29) Na ia a’oa’oina i latou: ‘Ia alolofa i o outou fili.’ Na ia tatalo fo’i mo nisi o i latou na fasiotia o ia: “Lo’u Tamā e, ia e faamagalo iā i latou, auā ua latou lē iloa le mea ua latou faia.”—Mataio 5:44; Luka 23:34.

**Ua agavaa Iesu e avea o se Pule e sili ona lelei i le lalolagi o lē e fesoasoani ma agalelei. Ae o afea e amata ai lana pule?**



# O Afea o le a Pule ai le Malo o le Atua i le Lalolagi?

Na manana’o nisi o soo faamaoni o Iesu e iloa po o afea e amata ai ona pule le Malo o le Atua. Na tali Iesu o le a latou lē iloaina le taimi tonu e pule ai lenā Malo i le lalolagi. (Galuega 1:6, 7) Peita’i muamua atu, na ia fetalai ai pe a latou vaaia ni mea e tutupu i le taimi e tasi, ona latou ‘iloa lea ua latalata mai le malo o le Atua’ ma ua toetiiti oo i le taimi e pule ai i le lalolagi.—Luka 21:31.

## O Ā MEA IA NA FETALAI AI IESU O LE A TUTUPU?

Na ia faapea mai: “O le a siitaua atu isi atunuu i isi atunuu, ma isi malo i isi malo. O le a iai fo’i mafui’e tetele, o oge ma faama’i i lea mea ma lea mea.” (Luka 21:10, 11) E tai pei o tositosi ia e faia a’e ai le tulagālīma o se tasi, o le tutupu uma o nei mea o le a faailoa mai ai e lē mafai ona sesē le faailoga. E pei lava ona faamaonia se tasi i lona tulagālīma, o le tutupu uma la o nei mea i le taimi e tasi, e faailoa mai ai ‘ua latalata le Malo o le Atua.’ Po ua tutupu uma nei faailoga i se taimi se tasi ma i le lalolagi atoa? Ia mātau faamaoniga nei.



## 1 TAUUA

I le 1914, o le tauua muamua lea i le tala-faasolopito ua aafia ai le to’atele o tagata nai lo o se isi lava tauua. E masani ona ta’ua e tusitala o le talafaasolopito le tausaga 1914, o se tausaga na matuā suia atoatoa ai le tulaga o mea i le lalolagi, ona o le tauua muamua lava lea a le lalolagi. O le tauua lenei na faaaogā uma ai tanetau na iai, pomu e to’ulu ifo mai i vaalele, fana taavili, kasa oona ma isi auupega e oti ai. Na sosoo atu ai ma le tauua lona lua a le lalolagi lea na faato’ā maua ai mea-tau atomika. O loo faaaauu pea ona tau e tagata tauua mai i lea vaipanoa i lea vaipanoa talu mai le 1914. O na tauua ua fasiotia ai le faitau miliona o tagata.



## 2 MAFUI’E

Na ta’ua e le *Encyclopædia Britannica* i tausaga ta’itasi, e pe ā ma le 100 mafui’e malolosi e mafai ona iai ni ona “aafiaga tugā.” Pe a fua i faamaumauga a le Geological Survey i Amerika talu mai le 1900, na ta’ua ai e 16 mafui’e malolosi e latou te faatalitalia i so o se tausaga. O nisi ua manatu e lē toe iai ni mafui’e, ae ua iloa e saienitisi le tele o isi mafui’e, ona o le lelei o le faatekinolosi. Peita’i, o le mea moni o mafui’e ua faapogaia ai mafatiaga ma ma’imau ai soifua o tagata, ma o se mea e le’i tupu muamua lava.





### 3 UTIUTI O MEATAUMAFI

Ua lē lava mea'ai i le lalolagi atoa ona o taua, faiga pi'opi'o, pa'u le tamaoai ma le faaleagaina o mea totō. I le lipoti a le World Food Programme's i le 2018, na ta'ua ai: "E 821 miliona i latou i le lalolagi atoa o loo fia aai, ae 124 miliona i latou ua matuā leai lava ni mea'ai." O le lē lava o mea'ai ua i'u atu ai i le maliliu o le 3.1 miliona o tamaiti i tausaga ta'itasi. I le 2011, o le māfuaaga lava fo'i lea o le maliliu ai o le 45 pasene o tamaiti i le lalolagi atoa.



### 4 FAAMA'I MA FAAMA'I OTI

Na ta'ua e le Faalapotopotoga o le Soifua Mālō-lōina i le Lalolagi: "Ua mātaulia le senituri lona 21 i le tele o faama'i mata'utia. O faama'i ua leva lea ua toe maua e pei o le ma'i manava (cholera), faama'i oti ma le fiva samasama, ae ua iai fo'i ma faama'i fou e pei o le SARS, o faama'i pipisi mata'utia e pei o le MERS, Ebola ma le Zika." O le faama'i pipisi mata'utia lata mai nei o le KOVITI-19. E ui i le alualu i luma o le atamai o foma'i ma saienitisi e faatatau i faama'i, ae e lē o mafai ona latou aumaia se vai-fofō mo faama'i eseese.



### 5 LE GALUEGA TALA'I I LE LALOLAGI ATOA

Na toe ta'ua e Iesu se isi vaega o le faailoga ina ua ia faapea mai: "O le a tala'iina atu fo'i lenei tala lelei o le Malo i le lalolagi atoa e fai ma molimau i atunuu uma, ona oo mai ai lea o le i'uga." (Mataio 24:14) A o feagai ai le lalolagi ma faafitauli matuiā, e silia ma le valu miliona tagata mai i atunuu uma, o loo tala'ia le tala lelei o le Malo o le Atua i atunuu e 240 ma e silia i le 1,000 gagana. O se mea e le'i tupu muamua lava i le talafaasolopito o tagata.

## O LE Ā LE UIGA O LE FAAILOGA MO I TATOU?

Ua tatou vaaia le tutupu i aso nei o mea ia na faailoa mai e Iesu e fai ma faailoga. Aiseā e tatau ai ona tatou iloa nei mea? Talu ai na fetalai Iesu: “Pe a outou vāai ua tutupu nei mea, ia outou iloa ua latalata mai le Malo o le Atua.”—Luka 21:31.

O faailoga ia na faailoa mai e Iesu faatasi ai ma faasologa o mea e tutupu o loo i le Tusi Paia, ua fesoasoani iā i tatou e malamalama ai i le Malo o le Atua, lea na ia faatūina i le lagi i le 1914.\* O le taimi lenā na ia tofia ai

\* Mo nisi faamatalaga i le tausaga 1914, taga'i i le lesona 32 o le tusi *Se Olaga Fiafia e Faavavau!* Iomia e Molimau a Ieova.

Iona Alo o Iesu Keriso e fai ma Tupu. (Salamo 2:2, 4, 6-9) Pe a pulea e le Malo o le Atua le lalolagi, o le a ia aveesea pulega faatautavā uma ma faafo'isia le lalolagi, e avea ma parataiso e nonofo ai tagata e faavavau.

Ua toe o se aga ona faataunuuina lea o upu o le tatalo lea na a'oa'o mai e Iesu: “Ia oo mai lou malo. Ia faia lou finagalo i le lalolagi, e pei ona faia i le lagi.” (Mataio 6:10) O ā mea ua faataunuuina e le Malo o le Atua talu mai Iona faavaeina i le 1914? Ma o le ā e tatou te tulimata'ia pe a aveesea atoatoa e le Malo o le Atua pulega faaletagata?

Ua toe o se aga ona faamautinoa lea e le Malo ua faataunuuina le finagalo o le Atua i le lalolagi

# O le ā o le a Faataunuuina e le Malo o le Atua?

Na a’oa’o e Iesu ona soo ina ia tatalo mo le Malo ia oo mai. Na ia silafia o tulaga leaga ua iai le lalolagi e lē o le finagalo lea o le Atua, ma e na o le Malo o le Atua e mafai ona toe faaleleia. O le ā o le a faataunuuina e le Malo o le Atua?

## O MEA UA UMA ONA FAIA E LE MALO O LE ATUA

I le mataupu ua mavae atu, na tatou iloilo ina ai faailoga ia na ta’ua e Iesu. O na faailoga ua faamaonia ai le faavaeina e le Atua o le Malo i le lagi ma avea ai Iesu Keriso ma Tupu.

Ua ta’ua i le Tusi Paia, na tuliese e Iesu Satani ma ana temoni mai i le lagi ina ua amata lana pule. Ua taula’i atu nei gaoioiga a Satani ma ana temoni i le lalolagi, ma o le māfuaaga lenā o le matuā leaga o le tulaga o mea talu mai le 1914.—Faaaliga 12:7, 9.

E ui o loo faasolo ina leaga le tulaga o mea i le lalolagi, ae ua saunia e Iesu, le Tupu o le Malo o le Atua le fesoasoani mo tagata i le lalolagi atoa. E faafetaia le galuega taua’o-a’oga faale-Tusi Paia i le lalolagi atoa, e pei ona folafola mai e Iesu ua mafai ai e le to’a-tele ona a’oa’oina ma faatatauina mataupu silisili faale-Tusi Paia i o latou olaga. (Isaia 2:2-4) E faitau miliona ua mafai ona atia’e ni tomā e fai ai galuega, faaleleia o latou olaga i le aiga ma iai se latou vaaiga paleni i meafaitino. O i latou nei ua a’oa’oina i aogā e latou te maua i le taimi nei ma ua faaagavaaina e avea ma tagatānuu o le Malo.

O le a faaleleia e le Malo o le Atua mea uma na faaleagaina e pulega faaletagata. O le a ia saunia

## LE SOIFUA MĀLŌLŌINA LELEI ATOATOA



## LE FILEMU MA LE SAOGALEMU



### O LE Ā LE ISI MEA O LE A FAIA E LE MALO O LE ATUA?

E ui ua pule Iesu i le lagi, ae o loo iai pea pulega faaletagata i le lalolagi. Peita'i, na faatonuina e le Atua Iesu: “Inā alu ia ma pule i totonu o ou fili.” (Salamo 110:2) E lē o toe umi ona faaumatia atoatoa lea e Iesu o ē e tetee ma aumai le mapusaga mo ē lotomālilie e usiusita'i i le Atua.

A o faagasolo lenā taimi, o le a gaioi le Malo o le Atua e

- **Faamuta tapua'iga sesē.** O le a aveesea tapua'iga na a'oa'oina manatu pepelo e faatatau i le Atua ma faafaigatā le olaga o tagata. Na faatusaina e le Tusi Paia tapua'iga sesē i se fafine talitane. O le a matuā faate'ia le to'atele i lona faaumatiaga. —Faaaliga 17:15, 16.

- **Faamuta pulega faaletagata.** O le a gaioi le Malo o le Atua e 'faaumatia malo uma, ae e tumau lea malo e faavavau.' O le mutaaga lenā o pulega a tagata.—Tanielu 2:44.

- **Faaumatia tagata amioleaga.** Ae faapefea i latou o loo maumaua'i e faia mea leaga ma mumusu e gaua'i i le Atua? “O ē e amioleaga, e faaumatia i latou mai i le lalolagi.” —Faataoto 2:22.

- **Aveesea Satani ma ana temoni.** O le a lē mafai e Satani ma ana temoni ona toe 'faasesēina atunuu.'—Faaaliga 20:3, 10.

O le ā le i'uga o nei mea uma mo i latou e talia le Malo o le Atua?



## GALUEGA AOGĀ



### MEA O LE A FAIA E LE MALO O LE ATUA MO TAGATA

I le pule ai o Iesu o se Tupu i le lagi, o le a ia faia mea e sili atu nai lo o mea e faia e se pule faaletagata. O le a fesoasoani le 144,000 o ē ua filifilia mai i tagata e pule faatasi ma Iesu. (Faaaliga 5:9, 10; 14:1, 3) O le a ia faamautinoa ua faia le finagalo o le Atua i le lalolagi. O le ā o le a faia e le Malo o le Atua mo ona tagatānuu i le lalolagi?

- **Aveesea ma’i ma le oti.** “E lē fai mai fo’i se tasi ua nofo ai: ‘Ou te ma’i,’ ma “e lē toe iai se oti.”—Isaia 33:24; Faaaliga 21:4.
- **Aumaia le Filemu ma le Saogalemu.** “E matuā tele lava le filemu o lau fanau,” ma “e ta’ito’atasi i latou ma nofo i lalo o lona vine ma lalo o lona mati, e leai fo’i se tasi e faamata’u iā i latou.”—Isaia 54:13; Mika 4:4.

## SE SI’OSI’OMAGA MAMĀ



- **Saunia galuega aogā.** “O le a matuā fiafia uma o’u tagata ua filifilia i galuega a o latou lima. O le a lē galulue fua i latou.”—Isaia 65:22, 23.
- **Fo’ia faafitauli i le si’osi’omaga.** “O le a olioli le toafa ma le laueleele ua leai se vai, o le a fiafia fo’i le fanua laugatasi o le toafa ma e fua mai e pei o le lili.”—Isaia 35:1.
- **A’oa’oina tagata i mea e mana’omia ina ia ola ai e faavavau.** “O le ola e faavavau fo’i lenei, ia latou iloa oe, le Atua moni e to’atasi, atoa ma lē na e auina mai, o Iesu Keriso.”—Ioane 17:3.

E finagalo Ieova ia e olioli i na faamanu-iaga. (Isaia 48:18) O le a faamatalaina i le mataupu o loo sosoo mai mea e mafai ona e faia i le taimi nei, ina ia avea ai oe ma vaega o lenei lumana’i matagofie.

# Ia Filifili e Lagolagoina le Malo o le Atua i le Taimi Nei!

Se'i faaata i lou mafaufau se afā malosi o le a afātia ai le tou vaipanoa. Ua aumai le lapata'iga a Matagaluega a le Malo: "IA SOSOLA ATU I NOFOAGA MALUPUIPIUIA!" O le ā lau mea a fai? E mautinoa o le a e sa'ili atu i se nofoaga saogalemu.

I se tulaga talitutusa, ua tatou lata atu i le taimi o le a agi ai se "matagi" malosi, lea na ta'ua e Iesu o le "puapuaga tele." (Mataio 24:21) E lē mafai ona tatou 'alofia le oo mai o lenā taimi, ae e mafai ona tatou faia se gaoioiga ina ia puipuia ai i tatou. O le ā lenā gaoioiga?

I le lauga a Iesu i luga o le mauga, na ia aumai ai le fautuaga lenei: 'O lea, ia faaaauu pea ona outou sa'ili muamua le Malo o le Atua ma lana amiotonu.' (Mataio 6:33) E faapefea ona tatou faia lenā mea?

**Sa'ili muamua le Malo o le Atua.** O lona uiga e tatau ona tatou vaai i le Malo o le Atua o se mea e sili ona tāua nai lo o se isi lava mea. (Mataio 6:25, 32, 33) Aiseā? Talu ai e lē o mafai e tagata ona fo'ia o tatou faafitauli. Ua na o le Malo o le Atua e mafai ona ia faia faapea.

**Sa'ili lana amiotonu.** E tatau ona tatou tau-mafai malosi ia ola e tusa ma tulafono ma mataupu silisili amiotonu a le Atua. Aiseā? Talu ai pe a filifili lava e i tatou le mea sa'o ma le mea sesē, e matuā leaga ona i'uga e oo i ai. (Faataoto 16:25) I le isi itu, pe a tatou ola i tapulaa a le Atua, e lē gata o le a faafiafiaina ai le Atua ae e tatou te maua ai fo'i se olaga fiafia.—Isaia 48:17, 18.

**Ia faaaauu pea ona sa'ili** muamua le Malo o le Atua ma lana amiotonu. Na lapata'i mai Iesu e ono faasesēina se tasi i le manatu, e mafai ona maua le saogalemu i le sa'ilia o le tele o tupe. O nisi latou te faatagaina

I le lalolagi atoa, e faitau miliona i latou ua uia laasaga e lagolagoina ai le Malo o le Atua



1 > Faalogo i le tala lelei o le Malo



2 > Ia matuā iloilo toto'a le Tusi Paia

popolega o le olaga e lofitūina i latou ma leai ai se taimi e sa'ili ai le Malo o le Atua.—Mataio 6:19-21, 25-32.

E ui i lea, na folafola mai e Iesu o le a maua e i latou e lagolagoina le Malo o le Atua mea e mana'omia i le taimi nei, ma olioli i faamau-niuga tumau i le lumana'i.—Mataio 6:33.

I le ulua'i senituri, e oo lava i soo o Iesu na sa'ilia muamua le Malo o le Atua ma lana amiotonu, e latou te le'i vāai i le mutaaga o tigā ma mafatiaga o tagata i o latou taimi. Peita'i, na latou maua le puipuiga. E faapefea?

Na latou ola e tusa ai o ta'iala amiotonu a le Atua, ma na puipuia ai i latou mai i faafitauli na oo i ē na teena fetalaiga a le Atua. O le malosi o lo latou faatuatua i le oo mai o le Malo, na fesoasoani iā i latou e oo lava i faafitauli matuā o le olaga. Na avatu fo'i e Ieova le “mana lea e sili atu i le malosi o tagata,” ina ia faamalosia ai lo latou faamoe-moe.—2 Korinito 4:7-9.

### PO O LE A E SA'ILI MUAMUA LE MALO O LE ATUA?

Na usita'ia e Kerisiano i le ulua'i senituri le faatonuga a Iesu ia sa'ili muamua le Malo. Na latou tala'ia le tala lelei o le Malo i lo latou

vaipanoa i lenā taimi. (Kolose 1:23) Po o iai nisi o faia lenā galuega i aso nei?

Ioe! Ua iloa e Molimau a Ieova ua lē o toe umi se taimi o totoe, ona aumaia lea e le Malo o le Atua le i'uga o lenei faiga o mea. O lea ua latou faia ai taumafaiga uma ina ia ola e tusa ai ma fetalaiga nei a Iesu: “O le a tala'iina atu fo'i lenei tala lelei o le Malo i le lalolagi atoa e fai ma molimau i atunuu uma, ona oo mai ai lea o le i'uga.”—Mataio 24:14.

O le ā le auala o le a e tali atu ai i le tala lelei? E matou te faalaeiau oe ia faaa'oa'o i ē na iai i le ulua'i senituri i Maketonia, i le aai o Perea. Ina ua latou faalogo i le tala lelei o le Malo lea na tala'ia e Paulo, ona latou talia lea “ma le matuā naunau.” Ina ua uma, ona latou ‘matuā iloilo ina lea o Tususiga Paia,’ ina ia faamautinoa le moni o mea ua latou faalogo i ai ma faatatauina mea na latou a'o-a'oina.—Galuega 17:11, 12.

E mafai fo'i ona e faia faapea e ala i le sa'ilia muamua o le Malo o le Atua ma lana amiotonu. O le a e maua ai le puipuiga i le taimi nei ma olioli ai i le filemu ma le saogalemu tumau i le lumana'i.



**3** > Faifaimea faatasi ma ē o loo sa'ili muamua le Malo



**4** > Faailoa i le Atua lou naunau e auuna iā te ia

Pe a e fia iloa atili e faatatau i galuega a Molimau a Ieova, taga'i i le [jw.org](http://jw.org).

E te maua ai faamatalaga i le silia ma le 1,000 gagana.

# O LE Ā LE MALO O LE ATUA?

E to'atele tagata o loo tatalo mo le Malo o le Atua ina ia oo mai, ae pe na e taumā-natu po o le ā le Malo o le Atua ma o le ā o le a ia faia?

## MĀTAU LE MANATU O LE TUSI PAIA:

### O le ā le Malo o le Atua?

O se pulega i le lagi lea e pulea e le Tupu o Iesu Keriso.—Isaia 9:6, 7; Mataio 5:3; Luka 1:31-33.

### O le ā o le a faatauina e le Malo o le Atua?

O le a ia tafiese mea leaga uma, ae aumaia le filemu tumau mo tagata i le lalolagi.—Tanielu 2:44; Mataio 6:10.

### O le ā e uiga i ai le sa'ili muamua o le Malo o le Atua?

E uiga atu i le lagolagoina atoatoa o le Malo o le Atua ma mau faatuaina o le a faaogā e le Atua lenā Malo, e faatau ai lona finagalo i le lalolagi ma le lagi.—Mataio 6:33; 13:44.



## FAAMOLEMOLE AUMAI SA'U KOPI O LE *Se Olaga Fiafia e Faavavau!*

Mo nisi faamatalaga e faatatau i le Malo o le Atua, taga'i i le lesona 31 o lenei tusi, ua lomia e Molimau a Ieova ma o loo maua i le [www.jw.org](http://www.jw.org)

GAGANA \_\_\_\_\_

IGOA \_\_\_\_\_

TUATUSI \_\_\_\_\_

Taga'i i le itulau e 2 mo tuatusi. O le faatumuina ma le lafoina atu o lenei talosaga, ua ou malie ai e faaogā e Molimau a Ieova faamatalaga e faatatau iā te a'u i le tele e mafai ai ina ia talia ai la'u talosaga, e tusa ma le Maliega Faaletulafono o loo i le [jw.org](http://jw.org).



E maua lenei mekasini ma isi lomiga i le Initaneti e aunoa ma se totogi



Ua maua le Tusi Paia i le Initaneti i le faitau selau o gagana

Faaogā le code pe taga'i i le [jw.org](http://jw.org)

